

TIMOR-LESTE NIA KONSILIASAUN HO AUSTRÁLIA KONA-BA FRONTEIRAS MARÍTIMAS

Iha 11 Abril 2016, Governu Timor-Leste hahú konsiliaisaun obrigatoria ho Austrália tuir Nasoens Unidas nia Konvensaun ba Lei Tasi nian (UNCLOS), ne'ebé Tribunal Permanente Arbitrajen (PCA) mak administra. Liu hosi prosesu ida ne'e, Komisaun Konsiliaisaun hasoru malu beibeik ho Timor-Leste no Austrália ho objetivu, atu hetan akordu ida kona-ba fronteiras marítimas. Iha 1 Setembru 2017, PCA fó sai katak Timor-Leste no Austrália hetan ona akordu prinsípiu kona-ba elementu sentral ba akordu fronteira marítima ida.

Saida mak konsiliaisaun obrigatoria?

Konsiliaisaun obrigatoria hanesan prosesu ida tuir UNCLOS ne'ebé iha painel konsiliador ida asisti parte Estadu sira hodi hetan solusaun amigavél ida ba sira nia disputa.

Bele uza prosesu ida ne'e bainhira iha sirkumstânsia hirak ne'ebé Estadu viziñu sira la hetan akordu ida no Estadu ida halo deklarasaun hodi hasees-án husi jurisdisaun orgaun obrigatoria hodi buka rezolusaun ba disputa kona-ba fronteiras marítimas.

Konsiliaisaun ne'e painel ida ho konsiliador independente nain lima mak halao, ne'ebé ema hanaran Komisaun Konsiliaisaun. Komisaun ne'e buka atu komprende faktu sira no pozisaun legal husi estadu idak-idak.

Timor-Leste mak nasau ida ne'ebé hahú uluk konsiliaisaun obrigatoria tuir UNCLOS.

Saida mak ita atinji ona iha konsiliaisaun ne'e?

Audiénsia sira: Audiénsia prosesual dahuluk ba konsiliaisaun ne'e halao iha Haia iha 28 Julu 2016. Tuir fali audiénsia pública ida iha 29 Agosto 2016, ne'ebé Timor-Leste no Austrália apresenta sira nia pozisaun publikamente. Audiénsia ne'e fó sai direta husi Tribunal Permanente Arbitrajen (PCA) nia website.

Kompeténsia: Austrália dezafia komisaun nia kompeténsia (legalidade ba prosedimentu sira) durante audiénsia prosesual ida iha 31 Agosto 2016. Maibé, hafoin ne'e Komisaun desidi ho lian ida deit katak sira iha kompeténsia (ka 'jurisdisaun') hodi rona disputa ne'e no fó sai desizaun ne'e iha 26 Setembru 2016.

Hakutu CMATS: Reuniaun seluk tan halao iha Singapura husi 13 Outubru 2016. Iha reuniaun hirak ne'e Governu Timor-Leste no Austrália konkorda ba pakote medida integradu ida hodi kria kondisaun hodi hetan akordu ida ba fronteiras marítimas permanentes. Hanesan parte ba pakote ne'e, Timor-Leste notifika Austrália iha 10 Janeiru 2017 kona-ba nia intensaun atu hakutu Tratadu Ajuste Marítimu Balu iha Tasi Timor (CMATS), tratadu provizóriu hodi fahe rekursu sira. Tratadu ne'e mate iha 10 Abril 2017. Timor-Leste no Austrália konkorda katak, tuir fali CMATS nia terminasaun, Tratadu Tasi Timor 2002 no nia kuadru regulador sei vigora nafatin tuir nia forma orijinal. Ida ne'e sei fó serteza ba investidor mina sira to'o nasau nua ne'e rezolve ona fronteiras marítimas.

Hapara kazu legal sira seluk: Hanesan parte husi pakote medida integradu ne'ebé konkorda ona hodi loke dalam ba negosiasaun kona-ba fronteiras marítimas, Timor-Leste hakutu kazu arbitrajen rua kontra Austrália iha 20 Janeiru 2017, ne'ebé relasiona ho jurisdisaun fiskal no alegada espionajen durante negosiasaun ba tratadu CMATS nian.

Negosiasaun kona-ba fronteiras marítimas: Iha Dezembru 2016, Timor-Leste no Austrália halo compromisu istóriku hodi halo negosiasaun kona-ba fronteiras marítimas permanentes ho Komisaun Konsiliaisaun nia apoiu, ne'ebé fó sai iha Deklarasaun Konjunta ida iha 9 Janeiru 2017. Komisaun halao reuniaun tan iha Janeiru 2017 iha Singapura hodi esplora nasau rua nia pozisaun kona-ba fronteira marítima iha Tasi Timor ne'e tenki to'o iha ne'ebé.

Akordu Prinsipal: Iha 30 Agostu 2017, durante reuniaun ba konsiliaisaun sira iha Copenhagen, Timor-Leste no Austrália hetan akordu prinsípiu kona-ba akordu abranjente ida ba fronteira marítima. Loron ida ne'e iha signifika istóriku ba Timor-Leste tanba iha loron ne'mós Timor-Leste marka aniversáriu ba dala 18 ba referendu ne'ebé lori Timor-Leste ba nia independénsia. Ho delimitasaun ba fronteiras marítimas, akordu Copenhagen ne'e haree mós ba estadu Greater Sunrise nian, dalam ida hodi dezenvolve rekursu, no mós buka dalam oin nusa hodi fahe reseita husi rezultadu ne'e.

Saida mak sei halo tuir mai?

Tratadu final: Timor-Leste no Austrália fiar katak sei finaliza komponente importante ba akordu ne'e iha reuniaun tuir mai iha Outubru 2017. Hein katak sei asina tratadu final molok 2017 remata.

Komisaun nia relatóriu: Hodi hakutu prosesu konsiliaisaun ne'e, Komisaun Konsiliaisaun sei hato'o relatório ida ba Sekretáriu-Jeral Nasoens Unidas nian tuir nia obrigasaun bazeia ba Anexu V UNCLOS nian, ne'ebé fó sai elementu importante sira kona-ba akordu ne'ebé Parte sira konkorda ona.

Oinsa ho Indonézia?

Indonézia la hola parte ba konsiliaisaun ne'ebé lao hela tanba prosesu sira ne'e só haree deit ba fronteira entre Timor-Leste no Austrália. Rezultadu ikus husi konsiliaisaun ne'e sei la afeta Indonézia nia direitu marítimas.

Timor-Leste no Indonézia konkorda tiha ona atu halo negosiasaun bilateralmente tuir lei internasional no hahú tiha ona.

Haree informasaun tan kona-ba prosesu konsiliaisaun nian iha PCA nia website: <https://pcacases.com/web/view/132>

